



鄭少谷先生全集卷二

閩中鄭善夫繼之著

後學鄭奎光章甫訂

五言古詩

草堂大風雨徹夜懷田家

旱魃自首夏今茲山吐雲  
翛然草堂前彷彿氣  
候新迅雷殷霹靂積陽乃  
沉淪振風颭而至凍  
雨猶傾盆中夜想抱被寒  
燠忽爾分回思前幾  
宵始得一爽神平明窺少  
谷生意復津津乃有



棗與榴落地紛成困，緬惟收歛畢，農務仍苦辛。  
造物詎可測，且幸蘓勞筋，陰陽未順序，吾憂尚  
無垠。

出自郭北門行

出自郭北門，松栢何續續，白日不到地，野草悲  
陽春，仰觀苦霧繁，俯眇白骨新，白骨火不化，髑  
髏夜相賓，颼風嘯有恨，大暮難再晨，昔爲囂市  
子，今作廣野塵，昔競刀錐微，今託鴟鳶親，玄運  
迺如此，彼蒼豈遺仁，蒙莊達生死，緬邈煩惱津。

孚齋

成心繡鞶悅，僨驕不可拘，脊脊廣運中，吾道其  
何如，且采亂藪澤，太素成遽除，畸人乘莽眇，焦  
火蹈若無，汎然涉九淵，木舟一何虛，得一合衆  
萬，瞻闕生明疏，至情通喘奕，而况孚豚魚，齋居  
霽煩想，茲理守弗渝，說巽苟不虧，化邦擴所餘  
睠言永登假，去與天爲徒。

遊建州陶園和淵明擬古八首

南服翔燠風，杪秋猶春和，水乾坐濡滯，木舟載



悲歌名園占原隰節物逝已多崢嶸甘菊叢綽  
約芙蓉花流景瞻應接覩爾懷陰何

其二

少小秉耒尚擔簦遠行遊如聞赤縣外更復有  
八州車轍苦未厭光景倏若流歸來守純氣遽  
然見丹丘乃知不出門偃仰六合周王風久寂  
寞吾行將奚求

其三

四序遞興沒萬有乘始終景陽未停軌積陰已  
肅戎何意松栢條蔚然乃獨雄糜糜田間草淅  
淅草上風凜秋一披拂姣好會有窮遲爾採脂  
苓服食青山中

其四

羣山積莽蒼莽蒼當座隅萬木忻適所境幽鬱  
以舒細霧宿陰洞叢菜亭廣廬東山抱遠志栗  
里賦閒居浮榮曷足縻三徑不可蕪歲華日向  
晚吾道乃晏如

其五



東南有一士名節貞自完葆光歸田園散髮懶  
不冠白魚人羞饌取色慈母顏幽居藏市廛白  
日以閉關客從遠方至情話憂絕端酒酣命僮  
僕取琴爲之彈希聲入窈眇忽下雙紫鸞  
履昭曠相期逾歲寒

其六

秋登黃華山恍然見大荒前有樂天居後有歸  
來堂堂居敝雲鳥回池亦淼茫主人端逸念蒔  
菊翳坻塲天寒菊未華逸念齊嵩邛桴汎通豕  
夕萬象爭低昂情景苟不虧余何動迷方緬惟  
無窮門引領情內傷

其七

我行復中野怛怛自今茲蹭蹬勿重陳所傷命  
與時非無青霞質素衣向已緇側聞雍門彈慰  
此中憂疑憂疑卒未解至音已無辭古風落冥  
冥大道不可思王喬非予願詹尹亦我欺江花  
莽消息遊子暮何之相逢東園公遺我考槃詩

其八



楚江有杜蘅葉短不堪採越山有舜華秀色昏  
且改不如擷芙蓉遠意薄雲海美人隔秋波秋  
容澹相待悠悠鶻冠子遯世豈有悔

北鴈步雲詞

昔我夢翼飛去與王子親雙雙鸞鳳簫吹破緱  
山雲翻身大火坑洗髓明河津嶙然馭白鹿下  
宴瑤池春枉駕鴈宕陰玄冥閉天闔醉掃千丈  
石萬劫畱至文只今靈峰洞元氣猶氤氳悲歌  
草木偃坐嘯天地聞歸來鏘光彩大隱金馬門  
君看東方生至人伏垢氛詎羅不了道一壑空  
云云

業書樓

台南有高樓下瞰澄江水飛甍冒流雲疏櫺一  
何媿重幃無長物三車擁圖史中有偉丈夫云  
是百世士連緒十二經咀爾蕩其滓緒罷三嘆  
息回首鴻濛裏迺知無物初萬軸皆糠粃青藜  
宵到門欲語餘一指目擊道自存我愛溫伯子

北山詩二首



朝發委羽陽暮赴紫霄期南遊歲向晚戀此溪  
山奇終風豁初霽陰谷雪已晞振策陟魯曲爾  
然見茅茨疏鑿信未倫情景殊匪虧新松會多  
翠遠江亦不迷素月明當中坐久生靈臺少焉  
寒威重尚覺陽氣微良朋矢爲好茲生幸未衰  
本性苟可遂毀車去何疑

其二

東行寓遊蹤逸軌迷西還矧茲玄冥月翳翳風  
景昏非無兒女懷所適山海觀陽崖冒遠陂陰  
壑注奔湍步雲青峰頂搜括窮其源前有空明  
洞蔦徑迴巖巒駕言采玉華將以遺所懽倏然  
雲霰集置身虛無間大道出此生靜者見臍肝  
願招柱下史去入無窮門

燕集玉輝堂

窈窕巖壑姿迢迢契幽曠緬懷天台勝遂寄山  
水癖赤城淹歲晏所戀有三益壯陰屈微陽關  
山雪盈尺雖嗟軌路阻稍喜緇塵息巾峰入草  
堂天葩進疹痍美人羅公車求友意何極文筵



麗奇態流觥樂無斃鹿鳴紛諧和造適非絲革  
退念兼與葭茲幸附圭璧覩空悟氣機體有見  
真色吾道未榛蕪鞮然露胸臆

送何仲默遊關中六首

跨馬出薊門馬行不旋顧丈夫重高勛狹徑有  
矩步狹徑非所遵將子恐歲暮多財乃善賈長  
袖乃善舞巍巍西昆丘矯首以延佇

其二

延佇如柰何離居生怨惜輸心風雨夕執手衢  
路側神交無古今長道有羽翮晤言念彌久去  
去結松柏女蘿乘飄風睠此中乖絕

其三

弱齒逃篇翰中達謝華藻深文用情性鞏悅口  
已掃簫韶奏虞庭鳳凰出瓊島至音動天地和  
者一何寡永言承德輝別爾乃草草

其四

登高望咸都送子過易水朔風何蕭蕭黃鵠逝  
未已肴函列百牢涇渭亘千里西當太白窟代



有隱君子長孺用高義壺遂且遠舉古道存遺  
編睠爾托經始

其五

崦嵫下西日翳翳風景昏虎豹扼九關廣利那  
復聞重華不可晤聖智乃沈淪鴟鳶日連類鵠  
雛遁其羣矢言引高步行止遵時屯

其六

杪秋行終南箭括高刺天黃河從天下列宿相  
勾連何意紫極北狼嘴張其躔南開蠶叢山北  
俯邛與鄜廣野闐無人草生鬱芊芊塵飛苦無  
象谷變會有然行哉殖元氣 皇圖壽萬年

武穆吟三首

南瞻岳王墳拊心訟宣和四海既無虞樂事一  
何多師師入帝側胡兵乃星羅舊時張諫議天  
闡語非訛但見戶括金不見士荷戈回首靖康  
末志士悲如何

其二

太尉出世姿用兵自神武懷中左氏傳羞與絳



灌伍燕雲唾手得甲卒盡熊虎北開玄冥天南  
靖朱光土國耻猶未雪百勝曷足數誓將與諸  
君痛飲黃龍府不觀穎昌旗氣已吞胡虜

其三

英雄無奈何氣數乘人事宋德但未光椒房生  
夢寐北狩不可返上天有成意壯士自苦心奸  
臣自長計蠟書晨到門將星夜墮地平生四字  
符竟落氣數裏桓桓蜀武侯殺身志乃已

佳人篇

青青塢畔蕉粲粲空谷女頭上金錯釵宛宛鸞  
鳳舞腰間碧玉佩娟娟下蘭廡言採草中英不  
踐草上露新製齊紈扇自障復自顧非無合歡  
被防身密如堵飄風吹楊花夫君渺何許長恐  
時易沉裁悲以延佇

贈呂愛員外

秋雲會崇臺觀子意彌遠新知何草草半饒迭  
酬勸同生不盡歡異世乃增戀真交重意氣豈  
必日繾綣叢菊有遠芳女蘿有深蔓大道淪滄



溟相期汎波瀾

芳樹篇二首

芳樹生廣除蒼蒼正輪困芳樹不自芳拂拂干  
紫宸朔風吹樹巔素雪舒其神今日曷不樂公  
堂有嘉賓把酒對蘭楹懽來不能陳微言托哀  
竹惠心欵以伸

其二

吾皇嗣歷服神武古絕倫拔劍下大荒裔夷率  
來臣大食獻寶刀大宛獻麒麟單于獨犯順戎  
衣不及晨軍聲動地起旦日至西秦分金賜五  
侯衛霍不愛身萬國拜稽首三祝何諄諄但令  
修文德王度永無愆

早起赴思道索飯

晨朝不舉火去扣故人門坐見相忘意終銜一  
飯恩醞謀蘓軾婦蔬摘長卿園童穉能看客文  
童不諱言粗豪吾豈敢道誼爾應存陶令時獨  
往杜陵歲七奔從來略温飽以此信乾坤萬事  
羈孤極元憑好弟昆



蕙娘織錦七解

扶風蕙娘織錦不下堂朝朝理機杼字字迴

肝腸織就遠寄將夫壻在襄陽一解夫壻別有

權置妾長門旁新愛正糾結舊恩一時忘二解

仰看天上星環轉如車輪經緯自有度卑尊豈

無倫憑妾手中梭想妾心上棼縱橫八百字反

覆合成言妾心方悔悟君心儻回旋三解蒼蠅

點素縞嫉妬無愧好憶昔君別妾人事何草草

君逐陽臺雲一去斷音耗妾似芙蓉花芳妍向

誰道四解朝雲歌未已隴水鳴不止願作青陵

臺同生復同死五解琉璃易破折紙扇輕一擲

生前參避辰死後致魂魄六解白頭且莫宣紅

顏多棄捐安得寶連波解妾回文篇七解

贈汪希周

朔風吹歲花之子意律光矧茲日初度乃值履

長月賓筵擊朱絃調急新商發君才當雄飛一

舉偃溟渤培風向天池九萬豈天闕終焉到彼

岸去去忘其筏北辰久未安欖槍耀雙闕睠爾



弧矢志翻身射星宇大業猶次且誓言共黃髮  
妾薄命

翩翩竝命鳥步步相諧悅中道忽分散鳴訴哀  
以切有生諒同懽有死願同穴衆雛羽翼短詎  
忍兩訣絕蘭芳不如桂荼苦不如藥妾身未能  
亡惡此中衰歇雙星下洞房流景何光潔照見  
君衣裳不見君顏色重泉睠有期海水亦有竭  
巍巍蒼梧山竹淚無時滅

燕歌

雲鴻下雀羅越客變燕歌燕歌聲激烈越客悲  
柰何長歌劔斫地短歌髮直豎朔風吹易水四  
座俱隕淚少年羞睚眦壯士重意氣拔劔殺仇  
家生死無顧忌猛虎欲攫人不擇愚與賢食膽  
中自知豈避猛虎前出門遠孤征雄劔終夜鳴  
竄身脫蘆下亡命入幽并幽并多豪俠結交踰  
平生杯酒接然諾信義何分明白日高漸離筑  
聲愴以怦田光爲君起片語謀立成荆卿獨忼  
慨舞陽乃輔行上馬報仇去土花照青冥秦庭



事一就千載揚令名

游俠篇

長安逢少年意氣何昂昂鳴鞭六陵坂先驅勢  
正強戒途列萬騎一一羽林郎鏡吹動地來颯  
沓若雲翔向前五花驄寶馬金絲韁腰間雙龍  
劍吳鉤飾英璜弄兒十四五藉綺凝素光行行  
且游獵游獵及上陽張弧向大漠忽墜雙飛鶴  
持歸平樂宴象筵歡未央借問此何誰云是漢  
金張六年起卒伍一日傾侯王丈人天帝子出  
入乘金閭揚聲重綸紵流醖爍朝堂逆鱗不可  
嬰太阿手所將乃知朱門貴溢恩胡可量

沱水三章

仙人騎白豨遠在蒼梧山我欲徃從之沱水深  
以瀾沱水深可厲蒼梧鬱嶢峴

其二

雲門何皇皇遠在洞庭岸我非沱上鳧日夜汎  
波瀾

其三



言采藤蕪草思心倏如摧不見王孫歸但見章  
華臺

同心結三章送林德敷赴齊東

文旗出郭門念子赴齊東攬衣起躑躅嘆息不  
得同鳳麟久增逝爰居亦避風冥運方險艱去  
去隨短蓬

其二

短蓬逐晨風轉徙無滯淫我其鴻與燕乖圻一  
何深雲臺志莫就奄忽昔與今平生廣陵散寫  
此歲暮心

其三

歲暮心匪夷哀絃久斷絕與子不殊調胡忍相  
訣別臨淄錦綺場子去守饑渴願保金石志慰  
我腸百結

五子二首

曹王振大雅抗懷逐游龍江馬亦決驟連翩乘  
上風汪生何慷慨接響蒼雲中京洛五鳳翔矯  
然下梧桐和鳴正以則至音激黃宮叔世競蟬



聒置爾荆棘叢上林逝若脫遐趾隨斷蓬素絲  
易以染姣女難爲容行矣歛華飾達人有深衷

其二

太山五株松冬夏恒蒼蒼涼風旦夕勁聲聞一  
何長聲聞曷足貴所貴蒙雪霜東封翳隆爵俛  
首以徬徨何言旃幪助乃見斤斧傷蒼顏日摧  
頽卒歲增慨慷但令本根固繁條會有強依依  
女蘿草永言附遺芳

安期生

人言千歲公昔在阜鄉亭賣藥青海上徒聞千  
歲名雙畱赤玉舄重報秦庭東指蓬萊頂風  
波連紫冥河津不可渡誰識安期生

我昔遠行邁

我昔遠行邁飄飄度溟渤洪波浩漫漫東下遍  
窮髮蓬山彷彿見鼇足互興沒回瞻赤霞城照  
耀金銀闕道逢五行仙姣好若冰雪璘璘白鶴  
車翩翩逐雲月導我探魚腸迺得餐玉訣入山  
採黃芽和之以璠屑服食引奇齡秘訣不敢泄



歛衽入懷抱三載字未滅歸來歷故都不復見  
物色回首望徽音徽音已斷絕桃花源不昧去  
矣忘其後

蘭陵贈王誕敷使君

何處見君子蘭陵西上門坐看蒼翠色蔚蔚照  
熊旛爾本蜀中彥才如橫海鯤余方閩地隱夢  
逐故山猿鬱彼風雲志潛然廊廟言並收弘治  
藉惟戀孝陵恩漢主親戎陣書生俎豆存迢  
迢去住意一與醉芳樽

遊張公洞二首

阮籍懷廣途盧敖歷四極尚慙壤蟲隘或哭周  
道阨伊余抱末衷迺泝二子迹北遊費歲年東  
歸睠幽蹟豈不念窮路黃鵠有羽翮陽羨山水  
區西奠洞庭側嵒扉靡雜卉菌芝類盈尺昔有  
攝生者於此煉金液空筌夙所慕靈洞杳莫測  
寒泉滴不散千歲成璆碧中有科斗書漫滅不  
可識竭來事冥探宛若藐姑射豈伊耳目娛但  
恐霜露迫緬思縞鳳吹儻值紫髯客修觀竟十



二累果及八百深功諒難期所志未忍息永服  
先聖訓至誠裂金石

其二

乘槎陽羨湖延覽銅官山山氣何氤氲飛崖鬱  
而盤西南有乳窟窈窕青雲關倏忽啓靈秘傳  
聞赤符間七日混沌死鬼鑿永不刊神竅通十  
洲清淺呈琅玕元陰伏其下六月冰雪寒仙鼠  
與石燕倒掛風雷壇仙人度羽去尚畱九成丹  
爰有好事者裹糧澹忘還冥搜了無得悵然回  
波瀾余亦採芝徒九載勤登攀九載在旦夕皓  
髮凌朱顏尚子旣畢娶坡翁復營田至人貴遺  
形細故惡足牽

與原侍御鄭地曹遊虎丘

祝融氣已深行雲麗晴暉霜臺早見招驄馬來  
駢駢升高目不極望遠神欲飛南風起木末吹  
我芰荷衣把酒白蓮池長談暮忘歸白日無却  
顧浮雲紛是非麟鳳在羈的心事殊多違何當  
晤生公參破區中機



汎舟五曲謁武夷精舍

朝汎碧浪溪夕宿隱屏下  
洄湍激九折溯洑以東注  
丹崖寫靈奇怪者莫可悟  
豈伊神理秘諒有鬼物護  
仙術非荒唐宣聖有矩步  
滂流無窮門直以夫子故  
依違尚友心蹇蹇恐遲暮  
終當據昭曠睠此結桂樹

龍溪

志士樂巖棲巖前幽鳥啼  
長風吹瀑布飛過白龍溪  
抵道桃花發桃源處處迷

古愁二解

出門采棠花風吹隴山木  
隴山未可行荆棘傷我足  
一解隴山高以臨隴水阻而深  
不畏傷我足但恐傷人心  
二解

偶書

神龍棲九淵志在天漢表  
終始養神德用九仍初九  
安能逐鼃蟻泥蟠東西沼

志士篇

河伯誇秋水未知東海深  
衆人尚雷同安識志



士心志士有苦心心苦道自舒上山思采玉人  
海貴探珠至寶非外假真詮豈予誣獨行何涼  
涼澗遵沂周衢雖無凌風翰睠此適國都升天  
而遊霧惕哉子大夫

楊白華

裊裊長楊樹青青垂白花楊花攬不住春色若  
爲斜如何官畔草萋鬱遍天涯

邊人曲

結髮事遠征能知邊塞情長奇汗血馬調戲郅  
支營大小七十戰金鼓夜自鳴稽首兩賢王大  
開受降城匈奴不可盡劍聲詎能平終生獨忼  
慨抗言請長纓

渡峽

凜秋行日夜短別去故里睠此有所思陟山復  
臨水重峽亘天塹下足頓逸軌回飈激伏瀾絕  
流渡濛汜西崦積暝色翳翳歛夕靡所憂風波  
集擊楫志未已至人乘虛無君子慮終始蹈險  
乃真見履順有滅趾矢言涉大川勿負橫江耻



遊石竺巖

少抱煙霞資雅志向林壑出門混世塵中遶反  
墮落聞道豈不早優游歲將迫言就巫咸問敬  
訪何氏宅石竺敞靈界紫雲冒巖箔匪夢復匪  
幻乃見鶴上客長跪訴悃誠曰予動迷錯授我  
靈光劔斬斷妖魔色竭來無窮門灑灑見天德  
接手浮丘老感恩詐云薄乘雲凌高丘永與世  
寰隔

題集山書院

大江貫蘄黃中有碩士居抱壁重一擲探元破  
羣愚偃臥大集陽悠然見蒼梧曾峰七十二芙  
蓉峻而都所戀得依托寧能去園廬衆山止其  
巔百川求其潛不觀洞庭濶但恐周道紆白鹿  
有筌蹄衡岳空筍筍玄玄入疑始吾與爾爲徒

黃山雜詩十首

黃山如岱嶽蘿山若梁甫曾顛過行雲光光自  
太古咸池蕩初景昧旦河已曙我夢天都行笑  
折扶桑樹



其二

燠風熙自南淑景變物色引領望巖阜光寵徧  
林薄撫茲盛農節耦耕及南陌雖匪康莊衢良  
用歌帝德

其三

經始朗上原秬菽長如茨巖霏散叢薄谷風回  
春姿童伴歌以嬉苦樂中自知甯生聲慷慨乃  
作霸王師

其四

黃山奠南服蝶官分楚望連峰標天樞結秀極  
地藏金鷄時一鳴高鳥不能上睠茲俯滄海窮  
歲夢波浪

其五

藍田有嘉植種玉世莫比靈氣紛璀璨熠熠寰  
區裏珞碧奴視之琳琅乃支子不遇後車載終  
伏磻溪水

其六

回溪下釣緝溪水見我志緒風揚伏波波伏風



不起中有雙文魚  
徙徙不受餌  
履茲釣鯨鯢  
培擊東溟水

其七

園廬春欲至  
歲事此伊始  
采芳入層雲  
散髮不及理  
蠶眠桑柘繁  
土膏農務起  
龍鬪未敢聞  
巢父正洗耳

其八

殊灘流湍水  
壑龍無時吟  
水流木葉下  
宛轉歲序陰  
歲序倏以改  
丹砂仍費尋  
蓬閣儻可求  
去矣極高深

其九

崇巒互經亘  
靈氛敞玄蓋  
天風散鼓鐘  
旦夕發清籟  
日晏紫芝苗  
山靜幽鳥萃  
真機秘心賞  
要在達者會

其十

停雲扇重關  
蘿風墮天聲  
遐構名山陽  
允諧真隱情  
詩書豁俗韻  
巖丘湛性靈  
鬱彼漆園篇  
聊用得吾生



謁紫陽精舍

竒遊歷四窮茲山負靈勝翠川玉篆繞丹巘  
花並浮桴臨星源仙踪煥雲柄圖經宛不爽  
神理杳莫竟緬訝開物初豈無稽天浸懷山  
谷就變赴坎槎交迸迹竒易讚揚歲深改觀  
聽竭來幔亭宴渺渺論神聖諒同武陵源去  
爲羸民病梵蛻昔所誹真函此須正所以紫  
陽翁不履黃庭徑遠矚悟氣機內照見真性  
永持哲士誠修身俟元命

雪晴登闔閭城

屯車闔閭城北風吹我纓殘雪輝遠山牛羊縮  
郊垆四望靖氛祲何以烽火明荆豫復梗化巴  
渝未休兵東方亂新定詎可言太平淮蔡連齊  
梁繁華轉凋零新鬼夜羣嘯貪攘日相乘闔閭  
少人煙狐兔行其庭向來膏腴地眼見白草生  
白草何田田不足飽蝗螟縣吏尚夏楚餘民死  
誅征我生夫何爲罹此百憂并拔劍出故里捧  
心向明廷八月過沛水長路愁榛荆宵雨惻野



哭晨風起鷄聲空日積悲憤豈不懷志誠承乏  
下三吳伏枕惟獨醒遭逢想馬周緝然慙匡衡  
客從北方來因之問神京狸鼯宣慢悞鳳麟多  
自屏荃蕙委厥美艾楸朝盈盈語罷各掩涕使  
我心逾怛捐珮遺故人畲我非衆馨媒拙終受  
詒好修誰共成吳儂亦有謠辛酸不忍聽東門  
有瓜塲予亦將歸畊遲遲俗士駕望望靈修情  
子夜歌三首

梅花在嶺南儂歡在山東梅花歡所愛不得附

冥鴻

其二

客從海上來遺我雙鮫綃鮫綃是何物畱此比  
璫瑤

其三

山有並命鳥關關感人心  
中夜有所思澄江不  
如深

歲晏行

終風薄旅衣遊子行天涯  
天涯行不息歲晏有



遠悲出入盜賊間進退昧所之休駕入彭城身  
在猶驚疑問舍得所安聊憫兒女嗤故人皆鮑  
叔眷我情委蛇論文具鷄黍旬日以爲期駕言  
東問津相送洪水湄中原且多難伊人復生離  
握手寫肝膽我舟行且維感此綈袍恩有心終  
酬知但恐喪亂後會晤無定時努力將奈何惟  
有長相思

湖上

太湖何瀲灩歲晏亦自好長風西南吹天水共  
皜皜遙峰七十二恍恍紅雲島洞天在空濛流  
水隔煩惱昔有綠毛翁於此采玄草至今白石  
牀風雲爲持保聞茲生古心携臚事幽討良朋  
旣同調遠客亦傾倒鼓橈乘龜鼉凌波擷蘋藻  
汎汎景將入默默意未了方壺不可問滄海恨  
無早歸循去時路木盡乾坤老

羅浮四百峰贈湛甘泉編修還嶺南

羅浮四百峰巒崩連青旻中有甘泉子頭戴玉  
臺巾伏火燒丹砂趺坐三千春下憫世溷濁飛



烏京華塵西歷太行山北渡長淮津瘡痍滿道  
路此意長諄諄回思葛稚川睠言慰所親傾蓋  
姑蘓陽探春五湖濱更欲折梅花持以遺遠人  
相從不可得獨步采江蘋

遊天平候思道不至

曉起發吳門遙望天平山秋風吹松濤入我衫  
袖寒白雲無朝暮好鳥聲關關良朋期不來獨  
遊心無歡駕言問名泉高典猶未闡山僧導我  
入桂樹聊躋攀我眼日已飽我身殊未閒平生  
抱丘壑三十驅塵凡尚恐豺虎劇不敢緣其端  
願從華陽君五岳時往還

居杭旬月遲王員外不克先赴閩州

昔我違京師秋月始生魄今我離越鄙凍雪迷  
廣莫良晤無久期達節守駒隙與子同派波復  
作中路折上天黑猿嘯下水白蜃斥如何臨歲  
晚廼爾事行役寒日下荒蕪雲林正蕭槭檣烏  
旦暮轉遂有川塗隔悠悠沈寥天切切風雨夕  
神交諒不爽萬里日親炙



夢戴寅仲二首

之子不可作壺公無春姿昆陵江水深游魂歸  
未歸風波闖汝東虎豹咆汝西北走限冰雪南  
征多蝮蛇年少死道路斯人更流離何以入我  
夢明我長相思萬壑真森茫三泉苦賊陝天高  
猿鶴冷尚有鍾山疑

其二

交遊滿江漢誰復更如子讀書京華塵相看忍  
羈旅訴心風雨夕潦草各別去云胡大宛種一  
蹶千里路朝陟洞庭山山遠不可處暮航太湖  
水水濶不可渡精靈復何爲白璧已黃土落月  
哀杜鵑切切復延佇

寄思道二首

中歲倦六籍出門事遠遊遠遊予何之五嶽還  
五州一鴈雲中鳴訴訴如有求芒鞋歲月晏得  
壘東海頭談文竟晨夕亦足銷吾憂相期每自  
勵志決天河流阨運當柰何捷徑不可由鳳鳥  
化梟鴟壘平行當休南湖煙水闊去去狎白鷗



失得勿復道上遡多前脩

其二

闌雲翳日景埃風起拔木我前駝白狐我後舉  
黃鵠我生值巖嶮行止不可卜椒蘭擲道傍藁  
蕘以爲馥楚璞胡爲爾和氏刖其足祇修防二  
兵古道何時復將子田商陰商陰有黃角

虎丘與近夫太初同遊

余幼寡好尚所求在岩巒青鞋白接羅護落三  
吳間良朋偶云集結我以歲寒殷郎自東海孫  
子自函關霜月明楓江駕言虎丘山歸雲擁絕  
閣下視空塵寰騰身慕黃鶴延年愁金丹願言  
事支遁孟浪烟霞端

悼志

豺狼立道周行旅限東西我生理酸楚歲暮猶  
麻衣盡室出故里生涯多差池萊妻對我啼稚  
子日受饑形容飽風雪摧折非平時世事就澆  
涼吾道將安之三韓在何處黃金不可爲焉能  
有羽翰飄去從安期



役役

役役不自息旦夕白髮新衆非紛往來誰能超  
世塵早年失所依迷誤三十春讀書不聞道空  
負見在身伯夷北之海宣父西問津行藏各有  
以予將希其倫青袍豈心事白雲終我鄰罷官  
亦何難去去完吾真

陪王中丞夜遊治平期到上方不果

湖上興不極復治東山具執策入治平繁霜濕  
衣屨山僧不好客高臥闔庭戶清商動木末靜  
聽不知處遙看上方勝子夜發襟素情長事乃  
違咫尺不得據月落空歸來寒猿挂深樹

吊古戰場

昧爽發汾水崇朝經白溝茫茫古戰場四時天  
爲秋斷魄化腐草精靈化寒飈英雄不可招世  
事如東流惟有戰士骨萬古無人收依依野草  
黃惻惻行人愁行人愁未已四海方戈矛

謁李延平書院

綠槐夾青山中有古書屋行舟劔水瀆弭棹叩



芳躅長風薄衣巾六月無三伏先生萬古心一  
旦付雲谷通來四百年民用如菽粟溪山發幽  
想吾志尚鴻鵠下有清泠泉一飲成三斛

石湖夜泊懷近夫思道二同志

移舟石湖路敬訪石湖水湖光上衣白夜景正  
如洗疎星散明珠淡月在湖底趨橋納微風沿  
溇搴芳芷美人不可作吾道滄波耳歲晚誰與  
期棠陵石川子

陽山與方思道同遊書事

晨光淑初夏野意招遊蹤策馬陽山行所親遠  
來從下馬結桂枝道穿白龍宮藉彼宮裏草乘  
彼桂下風渴飲丹井泉泉甘思慮空希君遺人  
世相將尋赤松

虎丘懷古

截截虎丘山盤盤闔閭墳墳頭閱古蹟劔池三  
千春蛟龍水中藏白日噓煙雲圖王事已空萬  
骨成灰塵湛盧南入楚神物焉能馴不必賣薪  
女王氣已湮淪



冬日與顧九和殷近夫孫太初顧與成遊  
太湖

漫漫五湖景役役百年客霜容舍廣墟申椒不  
勝摘葭管復氣候歲序莽消息羣山一何蒼遠  
水一何白燕臺旣迢遞玄圃又懸隔終當吸沆  
瀣去去結松柏

秋日尋友清溪用韻

深秋足爽氣蓮社有雅集我從西丘來蒲龕暫  
棲戢清溪在 cities 八月違暑濕褰裳涉溪水水  
芳遲余挹庭菊未吐華亦有翠可拾悠然發遐  
想西風鳴鴈急

虎丘與思道同賦

西郊下木葉商意殊不惡舟輿滯虎阜言覓方  
外樂招攜心所歡日暮倚高閣沙彌事簡澹菜  
飯謝杯勺雲霞閣外畱野興忻有托相期無柰  
何歲宴與俱作

感興二首

仰觀北斗星遙望北斗城天上故歷歷地下何



溟溟中原萬餘里數載風塵驚憂悲直愬天聊  
以舒我情情長天更遠矯首看鴻冥

其二

天河白如銀隔水處牛女咫尺不相從烏橋渺  
何許年年只一夕倉卒修雲雨金鷄催早發回  
車不得住含啼理支機尚悔當年事亦勝參與  
商睽離永終古

題白雪泉亭子

白雲在亭上清泉在亭下我本山中人來結亭  
前樹雲泉甘且冽予心永終慕塵機久未息禪  
機當早晤芬華隨高秋淹畱歲云暮

盈盈丹棘花壽張母

盈盈丹棘花歲寒麗奇姿樹之高堂背日有春  
風吹物貞本則固凝霜不能欺佩茲曰宜男采  
采心自怡駕言贈佳人金光以爲期

和思道

取友天下半今得方子焉爲官不受羈修身將  
到仙葉縣王子喬勾漏葛稚川明年適百粵期



子羅浮巔

菖歎二章贈鄭于漢

菖歎何葱葱乃在澗之濱歲晚開九花世人不得  
得紉秘之嵩山陰以埃九疑君念彼蒹葭草芊芊  
芊彌廣津

其二

菖歎何青青乃在山之隈歲久生九節茹之可  
絕粒華滋謝秋風憐爾固獨立吾將舍芝苓薄  
言采芳芷

天台二章爲應節婦賦

天台有方竹歷歷山之嶇奇姿奪春色標節方  
不渝天寒冰雪繁清陰固自如南方有佳人貞  
心與之俱

其二

天台有方石光潔宛如几大者何崑崑小者盡  
齒齒不是雕琢力豈無神鬼庇南方有佳人貞  
心與之比



鄭少谷先生全集卷二

閩中鄭善夫繼之著

後學鄭奎光章甫訂

七言古詩

朔州行

朔州城頭凝黑雲朔州城下邊人魂胡兒悍驕  
好殺戮少壯戰死今無存悲風南下吹簷築馬  
逸飲血太白窟不見鏡歌入塞門但見人骨白  
峯嶽近來衣冠苦出粟豈說千朝養精卒班生



介子不應募願弄胡笳令歸去

時逆瑾罰廷臣入邊儲

雨

黃埃莽莽二麥死幽天五月無雷雨  
穢疑青竹修大雩忽見黃頭澤  
下土少男風生鳥鳴渚蒼龍行天  
翠蛟舞兒童拍手歌蜥蜴微歛從  
茲脫筆楚廼者盜賊連三霜以致  
逆氣成早荒老稚大半委溝壑  
丁壯豈免從豺狼况爾犁鋤鑄爲  
兵縱有廢地無復耕東家鬻兒  
西鬻女骨肉之怨何時平只今一  
雨民稍寬柳葉榆錢尚得發  
莫令邊陲又金革公賦從容私始得

古劔行贈仇將軍北征

將軍手提三尺冰乃是鬼國之鐵  
大齒之珎滄溟水枯涿不成莫邪  
斷髮躍冶死而後龜文漫理流天  
晶霜鋒閃爍鷲鵠凝萬金吳鈎拖  
頰纓北斗七宿土花發青天寶匣  
迴機衡斬蛟斷犀俱細事此物自  
是蒼龍精江翻河及罔象急提  
出白曜搖東溟飛芒殺白帝喉下  
不可嬰豐城古獄誰識女斗牛之  
墟元氣升沙塞秋高塵壓



城黃龍白狼不肯庭山甫無人武安死戰馬西  
向徘徊鳴安西都護君好行此物應世世當乎  
丈夫叱咤鞭風霆國難不赴非俊英劔乎劔乎  
吾與女同死生

林員外東甌斗城圖引

連山蒼蒼若星宿大江孤嶼象雲構我行東南  
未見此云是東甌斗城子巽吉仁王柄東指松  
壇華蓋魁堪擬西山岩堯作領袖就中陳迹無  
不有前有王將軍後有謝太守白雲春草蕪沒  
久墨池歲歲生芳菲自有王謝經行處至今景  
物無塵垢紹興以來產俊英周劉鄭薛次第興  
咸淳之上二百載醇正無過王龜齡要皆山川  
所毓秀亦自守者善造就林侯風流士直駕王  
謝後賓御盡才藻形勝布篆籀功成北首誰與  
娛但寫江山入畫圖行邊似防百怪出耳畔長  
聞海波入駐鶴亭吹笙臺更有鴈蕩四百峰崔  
巍千年陵谷辭劫灰我生胡爲處溷濁明日黃  
冠歸去來



小岷山歌

君不聞小岷之山連胃婁雄視西川十二州青  
天萬古走蜿蜒峰迴嶂轉無時休劔門峨眉名  
失勢白帝烏鼠俯之如浮漚上有許由瓢世人  
不得用直挂月戶三千秋蒙泉瀉天奔龍湫巴  
溪浚浚學字流溯騰入汶江萬里滄溟收山中  
老桂色不滓芝草琅玕爛成綺洞口長回聲利  
車盤石但坐煙霞侶宋有蘓長公隋有劉仙子  
探芝斲桂樹長鑱亂雲裏小岷山巉巒不可攀  
劉蘓以後人迹復不到迺有曾東石架屋讀易  
於其間平生負此滄海志少年訪道青城山上  
飡青城絕壁之流霞下弄岷峨陰壑之潺湲黃  
熊蒼兕不敢迫猿狖叫嘯情自懽空谷無人行  
蘭草復翻翻揭來遊人世十載愁朱顏吁嗟乎  
青山信美蒙泉亦可以洗君耳君胡爲乎城市  
許由之瓢欲何俟終南有捷徑北山有俗軌玄  
猿獨鶴煖眼冷眼遙看爾紅塵白馬有何益柴  
桑不負陶彭澤歸來乎曾東石



天津同王劉二子較射西營因賦長歌

病夫平生滄海情南征喜得王時行天津橋邊  
秋氣清邀我醉遊劉伯耕投壺叫白意未已乃  
復較射城西營劉君膂力信莫當控弦運肘固  
所長王郎生長在南方亦能左挽五石強調弓  
坐使猛獸伏矯矢豈有飛禽翔當場角勝不相  
降神臂拍張人堵墻伶人考鼓輿臺走白日冉  
冉迴精光鋒翎衝撞氣益揚觀者顏色歛沮傷  
熊渠以上合比數拔勝之輩斯尋常病夫雖然  
力不足見爾誰能分碌碌騰身卽把志歸接引  
手轉被繁弱掎沉思重自咎百罰敢辭辱忽憶  
先皇時此技何曾錄承平却作凶器比喪亂  
始識文事跼乾坤比年氛祲厚幽豫青徐虎狼  
吼專城將軍習逃走遂令死者十八九至今楚  
蜀猶未夷六軍雖衆能者誰轅門衣冠更寬博  
教場藜莧成町畦吁噉王劉學孔子反有餘力  
從事此幸須爲國收多壘吾聞茲藝德之輔匪  
直區區爲閱武君不見矍相圃公罔之裘揚觶



語衛昌蒙弄巧弗取射乎射乎吾愧汝

汶上對月聞笛作商調哀切命船人度曲  
爲和因賦醉歌

焉者八月高風起鴻鴈羣飛渡洪水月下清砧  
愁遠人天涯芳草思公子王郎哀時最蕭瑟萬  
里迢迢向南國呼我上船設冰鱠仰天頌酒開  
胸臆關山茫茫何處邊但見急管哀中天馮夷  
聽曲波面出楊柳亂落西風前酒酣月落歌未  
已隴思江情嗒然起未掛姓名玉策上願添海  
水金樽裏人生合歡那可測有似大海翻萍葉  
回首親朋各別離豈無江漢通舟楫流光過鳥  
不復駐達官好爵身之蠹况迺豺狼橫地軸何  
限驕驕窘天步竹林諸賢皆酒徒嗣宗只願步  
兵厨古來賢達一澌盡醉鄉之托今何如

憶弟

去年蘓臺送汝歸布被獨臥愁依依畚田力薄  
霜雪厚憐汝受凍仍啼饑北有鴻鴈南鯉魚但  
見風塵不見書深林大道防豺虎萬里看雲涕



如雨

猛虎行

玄陰冥冥天欲雨蒼兕嗥風劈林莽磨牙下山  
天爲愁白日殺人如捕鼠我忽聞言仗劍出彎  
弓却射白石人吁嗟鳳麟無時來故使此輩爲  
民菑不然驅汝渡河去河北蒼生非草萊

鍾吾行

皚霜凜凜頽楊柳鍾吾驛前白狐走山東虎穴  
已盡除淮北人煙亦何有自從天狼犯東斗殺  
掠如山如拉朽四溟兵氣寂不揚縱有城隍誰  
則守黃河無梁葦可渡曷不去此甘爲虜就中  
一室三十口那得孤兒應門戶投生避死誰不  
知鍾吾令長實主之

桃源行

黃河水盡蛟龍馴桃源沙飛愁殺人東方亂後  
再反覆憶昔過此增煩辛扁舟困頓不得攜賊  
壕只在河東西路官邑子微服走大屋高門狻  
獍啼到今事定還是非請問流民歸未歸



行淮北戰場

我君渡淮水倉卒見賊壘一聲金鼓鳴馬躍昏  
風起三千義兵坐倒戟一日同赴黃河死嗟爾  
漁樵人何曾識蒐狩但聞鶴唳膽已落乃使執  
盾從敵後邊頭將軍故縮手要取金印大如斗  
淮陰寡妻啼向天遺恨東行劉太守

遊子

桐江水清石可數遊子思歸作漁父空谷春深  
記薜蘿長途日暝憂豺虎入林何曾見赤雀結

舌詎可賦鸚鵡皇天反正誰則知有客哀傷重  
延佇

去年行

去年狼山北風驟斗間坐見狼星殞南下旌旗  
若震電東奔盜賊如虿粉皇天厭亂欲大誅爾  
輩曷早爲身圖好趁天兵未臨女卽銷鋒鏑作  
農夫

兵馬行

越南諸州復召募滾滾盡赴姚源戍鉦鼓聲填



滄海鼉旌旗色閃扶桑樹欃槍耀芒犯女斗虎  
豺也更能咆吼部伍存亡不可知擣衣愁殺閨  
中婦天寒野營雪嵯峨指墮未易親干戈幾時  
奏凱標銅柱願得將軍似伏波

百憂行

自我結束出門時正值世路多艱危匪才被蒙  
主司錄壯圖恐負平生期刑臣干紀作厲階此  
輩乘勢爲狐狸朝中衣冠死桎梏意外括索空  
茅茨君門萬里不可測虎豹九關那得窺所以  
流殃遍海岱使我積憤齊峨眉一時安化起作  
孽敢睨神器寧無詞山東鐵騎皆王臣亦忍弄  
兵於潢池 高祖社稷豈易改 孝宗惠愛無  
子遺所賴 天子開神聰大加顯誅不復疑繼  
是諸賢出補葺至今萬姓猶瘡痍朔方三邊屢  
入寇桂林羣獠長勞師意者蠻貊本梗化雖在  
平世亦若斯荆巴乃是荒服內五載恃險夫何  
爲要之三將愛生事民瘼肯與朝廷知遂令赤  
子化魑魅乳臭小兒盡緋衣况聞村落吏捉人



比併只爲供軍需去年華林覆大衆今年桃源  
殺偏裨乃者狼兵豈得已所過慘於熊與羆四  
方郡邑所召募紀律不一皆逃歸以此公私厭  
金革廟議復欲爲羈縻安得一下罪已詔民得  
粒食莫爲非

歲晏行

烏龍山頭鴉亂飛客子迫歲憂蒸藜姚源餘孽  
幾反覆玉山一路方塗泥黃雲阨關鼯狄啼前  
有戈鋌後鼓鼙十年通籍何辛苦猶自飄蓬負  
老妻

臯魚子

陟阿丘以風白楊搖搖朝暮中烏棲白楊樹飛  
過阿丘宮臯魚子抱樹啼爲我問終風何事無  
已時父母不得養兒心亡絕期兒心有絕期木  
華落盡風不吹

今辰行送張敬中

吳所

今辰何辰秋復暮黃花欲吐且未吐越王臺上  
風不迴謝女江邊葉如訴征途遙遙不肯住歲



晏天涯向何處冀北能無屬目雲閩南會見傷  
心樹憶昨奏賦大明宮綈袍布被昕夕同于時  
公壯我尚少許身奚啻登夔龍黃塵白日兩相  
蒙世事變覆真太匆十年風波苦汎梗一旦鬢  
髮成飄蓬阜鵲飛來意怠杳龍媒跛足眠芳草  
勛業空嗟明鏡中巾鞋早向荒山道公今走馬  
黃金臺黃金安得如山堆自信材官少貧賤豈  
有志士久塵埃石田豆苗半枯死余獨憂勤弄  
煙水劉向何心厭簪紱管寧薄命甘泥滓他日  
西方相憶無北魚南鴈徒爲爾

大水歌二首

閩州五月雨不歇劔南諸溪水俱發溪邊樹木  
纏風雷郭外人家走魚鼈野老惟憂禾黍歇尾  
閭不見波濤泄君莫恨去年前年雨水絕越王  
臺下江流竭行人道上思飲冰古井鹽花白於  
雪

其二

玄陰冥冥噎不通五月六月皆天風雷霆嘯海



烏兔急田野盡在波濤中南山豆苗沙壓死東  
畚禾頭半生耳志士寧辭溝壑填農夫自此生  
事已君不見無諸城外鬻幼男今歲誅求豈但  
三

獨樹篇

豫章之山盤盤乎截業而倚天石壁萬仞荒忽  
噓雲煙上有獨樹風雷纏輪困偃亞黛色古百  
圍竅穴諤吸諂突飄風傳孤根入地幾百尺云  
是蘧仙手植距今三千年內注沆瀣華外盪日  
月光枝翻浪湧子墮金香自是靈株屢飛動天  
鷄海鷁空多夢白日影倒彭蠡陰黃昏聲壓香  
爐重千峰遠意舍太和萬木豈敢爭嗟峨霹靂  
空中下矢石洞庭無地浩然風波茲木結踞其  
如何大厦長年急梁棟心猜目眩今猶多君不  
聞上古有大椿萬六千歲爲秋春精英幻化那  
可測至今世有青牛君茲木無乃是不然何以  
有此垂天之蒼雲山樊古栢相葱菁早晚移根  
天帝庭修條思在雪霜外肯與衆木分光榮相



梨楸桑亦翦鬱培擊拆泄豈辭辱商丘之樗曲  
轅之櫟非不巨且齒拳曲軸解徒爲爾吁嗟乎  
豫章獨樹何神哉安得長梯倚天畔上採附枝  
下柱明堂摧

君莫疑行送道宗赴闕

長歌一曲楊柳枝短歌一曲青雲詞近前勸君  
君莫疑男兒不作兒女態所貴國士當酬知與  
君俱非年少時桑弧蓬矢何當遺腰間環珮光  
陸離取媚泉石非其宜畱侯只掉三寸舌黃石

將略真王師甯戚車下鳴聲悲風塵漫漫緇短  
衣五殺大夫百里奚世主不識終塗泥英雄所  
耻比草木且復俛首就鬲羈故國萬世尤神奇  
安能鬱鬱久居茲子雲寂寞空守雌屈身伸道  
非君誰君知鴻鵠合高飛一翥萬里無天涯短  
枋香稻藏采且戈人慕君君不知閩風玄圃便  
棲止慎勿下飲淤塘陂於乎慎勿下飲淤塘陂

衡山高贈周公儀方伯

吾聞天高不可升南嶽上應天璣衡絕地七千



五百丈祝融之峰最巉嶒乾坤開闢自古綱維  
平三山西圮六鼇死然後陽門反戶東南傾噴  
空遏日乃有此巨鎮儼如天王神武虎臣矯矯  
來干城離宮富炎德桂樹常冬榮若非崑崙西  
起占樞紐泰山之外誰當南嶽之縱橫芙蓉石  
廩勢騰擲雷泓風穴聲礧礧七十二青蓮一一  
凌紫清行雲膚寸合呼吸遍四溟鴻鴈高飛不  
能過嗟爾鶴上人胡爲抗行雲而上征回風瀟  
瀟吹古雪倒翰七澤流三星瀟湘如系淪洞庭  
君山萍漂一點青纍臣帝子不可以招而返兮  
但見蒼梧慘澹鼓瑟悲湘靈吾聞地有五嶽猶  
天五行衡山萬古合崢嶸日南天闕儻或折尾  
閭汎溢地道何由成吁嗟乎祝融馭無極朱鳥  
來有憑夫何爲乎絳天芒熒炎海波濤驚天生  
豪傑須爾用五嶽四瀆備爾形彌綸藩翰豈比  
塊然者不然天將誰使之清地將誰使之寧周  
夫子崇高遍博要如此平生意氣吾與爾

歲暮集林中丞宅



中丞華堂集衆賓金杯玉盤興未了尊前羯鼓  
催落梅醉後佳人媚芳草洛波二龍臥已深睢  
陽五老歸應早座上狂生感歲華銅龍咽月霜  
天曉

涵江寄伯固

囊山十里涵江市不見涵江見溪水溪邊柴門  
占青竹市上高樓夾蒼梓市南故人黃省郎後  
峯自壘對茅堂一旦相思輒命駕豈無消息到  
君傍

麥斜行

今我不樂遊麥斜石田瑤草搖春華洞門玲瓏  
駭初見細路窈窕行未涯是日春光正駘蕩黃  
鸝布穀聲相向遠樹葱菁色已齊古木詰屈神  
猶壯巖下山翁供酒餽賞心豈復憂行厨雲端  
儻遇林樵谷爲爾分張石室書

再題望夫石

登彼關山望君來歸朝朝暮暮君不來歸襖中  
兒女大日久無完衣泉水滔滔不入山男兒出



門良獨難今時畏途相戒蛇豕相殘欖槍苦未  
滅君身無時還君身亮自惜妾身無羽翮思心  
從君安可得晨興望君暮化爲石

芝谷歌

商於黃公人不識獨臥空山候秋石紫芝風香  
吹滿谷渚蘭汀芷無顏色兒童對客歌白雲此  
曲人間那得聞

玄明宮行

君不見玄明宮中積金碧云是權璫結真宅貝  
闕憑陵上帝居彤臺照耀長安陌瑯龍鑄虎歛  
飛動至今赤日風雲黑崖壑天開朔漠搖鯨鯢  
日吼滄溟仄探竒祗見靈怪集矯首翻詫星辰  
迫西國祗園應渺茫六朝蕭寺空千百白龍胡  
爲作魚泣想爾當年勢輝赫土木經營動四方  
珍奇聯絡來重譯分明造化出其手左揮右霍  
何不得欲將燕市作蓬山便有神人爲驅石奸  
雄到死竟不悟驕奢之末無終極氣數相乘可  
自由李猫趙鹿空回頭君不見大市街頭權倖



路古來壘粉誰曾收

雪山歌和薛君采方思道

君不見南宮少谷老麻鞋布褐色枯槁萬事都  
歸混沌裏一生但結江山好未卽乘牛函谷關  
尚須跨馬長安道長安歲暮雪滿城毳雪便築  
山崢嶸巖嶽踞地虎豹急星躔斗轉山河明玉  
女峰前瑤作臺夸娥一夜輕移來袍笏真當米  
芾拜詩篇數荷鄒陽裁階墀把玩已兩月皓氣  
遥遥正相得塵土誰分冰雪姿市朝聊寄煙霞  
癖未妨頽曷旋補葺時見消融勢尤岌嘯月長  
聞白鶴回合風豈恨青陽及青陽青陽謾相放  
金石瑱瑱本波浪適來天地入虛無何事么麼  
論消長

鞠歌贈思道

垂桑弓挂蓬矢旦夕如長鳧誰將哺爾烏來啄  
粟飛入網羅將爾含哺向滹河河水漉漉黃沙  
淫淫琴絃自有心翻奏山水音流響入明堂錫  
爾龍鳳章但得龍鳳章不願尚書郎持歸報爾



父母父母之恩安可畢歌黃鍾鼓朱瑟高堂沉  
沉射紅日

東溘柴門歌陳執之侍御席上與思道同  
賦

瀛海之濱龍門高萬峰迴合相騰逃歛忽雲氣  
隨六鼇沙蟠石走地不毛八水東飛溘其下青  
天白日風雷號蛟龍窟宅掀夜濤深不可測安  
可撓天吳海若長周遭豐隆雨師爾所操上天  
下天直頃刻沾灑后土如流膏東海仙人騎赤  
鯉翱翔盡決三千水下憫濁世意未已六龍鞭  
策風雲裏神功一斂容一指太虛不動民安止  
柴門蕭蕭水之涘但見金波墮潭底世人不識  
柱下史魯進當年圮橋履余也青雲一畸士袖  
中三尺龍之子只今濩落甘泥滓乾坤不交國  
士耻有往必復自此始惟願爲雲逐君起  
思道屋爲暑雨所破爲作破屋歌

南州暑月氣正溽伏雨衣裯盡如漉朱方轉東  
熱更酷渴想宮冰與夏屋不應天氣反北行苦



寒之地炎蒸沃長安敞廬淫雨裏上漏下濕寧  
安宿方子新顏籠鶴亭鄭生亦失窮後木郎官  
俸薄食指繁原憲終辭九百斛伏金未伏火未  
流虞書曆象今難讀安居美食古所賤陋巷簞  
瓢分須足洛陽杜鵑濕不歸願得羲和宅賜谷

徐瑞卿給事所藏仲姬墨竹引

田郎掉臂登我壇手持一軸青琅玕云是仲姬  
真蹟畱世間徐卿得之歲應寒煙波淋漓灑不  
乾蝸蝓蛇蚶古所難風劫劫葉僅尺許遠勢翻

在青雲端燕山六月雨不止暑氣如焚汗如洗  
那知此君入我側便有秋聲落吾耳偏側未柁  
洞庭流虛無更憶瀟湘水君不見洋州文學士  
渭川千畝不盈咫筆鋒取自心眼底但見鷹鷂  
隨兔起又不見前時蕭協律能工水墨古無匹  
疎寒不作筠粉態瘦勁獨得簫韶質蕭郎丹青  
久絕筆洋州鞞材誰祖述勝國諸賢各擅場只  
數仲姬入其室至大由來二百春墨痕縑素看  
猶新得非尤物自有鬼神護無乃好事者摸擬



希其倫於乎貌物非物人非人天地亦到么麼  
津徐卿畫本且莫論眼前萬事誰僞真

南唐後主畫竹引

昇元閣上作賜宋齊丘

君不見彭城彭奴元姓李早入徐家稱帝子又  
不見九華山下齊丘生晚入南唐作謀士同時  
契合風塵裏草昧君臣若魚水淮北初收格鬪  
塵宮中漫得丹青理昇元閣上寫墨竹翠葆蕭  
森鳳毛起手書珍重表恩殊御墨淋漓濕桑梓  
世代相催猶夢幻金陵畫餅寧復爾帝王從古  
多好手人物絢素無不有前有殷武丁物色惟  
傳傳巖叟後有宋道君鷹犬驂驅歛飛走丹青  
意氣稍或別治亂典二一回首彭奴彭奴聽我  
歌淇水才賢本衆多但惜九華山不似傅巖阿  
吁嗟乎竹花零亂歲蹉跎鳳凰不來將柰何

白紵歌二首

白紵歌白紵舞吳趨青童越素女翩翩綺縠鸞  
鳳舉流宮轉徵清激楚玳筵璫膏君莫忘卿雲  
燦燦世將昌赤日時下舒以長令君黃耆樂無



疆

其二

蘭陵白紵色勝銀裁縫舞袖當上春調箏考瑟  
宴嘉賓送意尊前未敢親東方將明樂不違主  
人歡笑客忘歸鐘鼓齊發且復希矯視雲端雙  
鶴飛

太乙山歌

吾聞終南太乙峰迺在於天都陸海之中巨靈  
負顛與天通丹梯直駕太白窟金精反射蓬萊

宮西南爾是華夷關日月平視如跳丸但見黃  
河涓涓下霄漢齊州九點翻波瀾鼇掣鯨掀勢  
何勁三星不度龍沙暝華岳峻嶒徒自雄漢陂  
盆盎虛相映山中之人復自奇驂鸞翳鵠凌雲  
達袖中劍器撥時危林猿臯鶴且莫疑君不見  
衛叔卿白鹿雲車謁天子問之不答意何長興  
亡已落紋楸裏留侯談笑用漢帝功成麟鳳誰  
能係孫登長嘯蘇門山聲似黃鐘動天地達人  
修身俟世至得薪用光始有濟才多識寡嵇叔



夜爾曹寧免今之世吁嗟乎終南太乙長崔嵬  
虎視龍興安在哉霸王賢達俱塵埃峰頭儻結  
三花樹從爾黃冠歸去來

題呂紀畫鶴

國朝畫禽誰最精四明呂紀推獨步貌出青田  
一片影天機物色生毫素霜翎藻質何翩翩月  
下蒼虬欲上天半夜狂風吹碧落揚聲直徹廣  
寒邊鳳凰不來猿鶴悲似憐獨立羽毛稀若遇  
遼東丁道士聯襟接翼與同飛

畫山水引

天風盤松翠蛟吼白浪浮山蒼兕走月落未落  
光射空道人夢在滄洲東雲冠雪髻烏皮几皓  
首相從只黃綺我亦天台採藥師爲君更話蓬  
萊水

一樗散人歌

君不聞漆園傲吏稱上仙商丘之樗人共憐棟  
梁繩墨祗須論散木不有全天年林夫子一代  
賢揚輝飾智君不然有才耻與短世用滄溟臥



處洪波無邊手握青玉芝暢歌雲和篇奇氣不  
可秘吾嘗得君于三狼之紫煙拜君牀下稱豎  
子大兒小兒安足傳酌君酒將君髯乾坤盡納  
芥子裏大道之下聖蒙融晦俱茫然掌中樗樹  
大莫擬附枝屈鐵龍夜起

長歌行

南湖谷老誰識爾被褐裹頭臥桑梓早時讀易  
編屢絕直道如絃仕三已郎官十年窮不休八  
口羞稱折腰米虞廷咎夔苦夢寐前代君臣若  
魚水老驥伏櫪志千里綈袍百結吾不恥魯生  
甘守白茅屋張良還從赤松子洛陽少年抱區  
區漢室規模叔孫禮嗟哉往事誰向語惠施無  
人子期死鳳凰樓下黨錮成濁流豈但十一士  
君不見申屠蟠滅迹煙霞裏又不見郭林宗涉  
世終泥滓滄江日落歸去來東山草堂安在哉  
遲清亭子風拔頽貧賤如此令心哀殷王中興  
圖逸才孰爲霖雨爲鹽梅終日畚鍤歌徘徊於  
乎終日畚鍤歌徘徊



題趙子昂林木

元朝學士宋家子手得丹青古莫比筆端點染  
入精妙心上經綸乃如此唐之畢宏宋郭熙林  
木山水那兼美一匹縑素動數旬工夫細膩世  
絕倫未論意象補造化已覺氣勢生風雲眼中  
蛟龍相盤拏風雲變態何詫嗟草間莫着王孫  
足王孫芳草今天涯君不見馬遠區區念宋家  
殘山剩水胡爲耶

遠如期

遠如期黃道亨聖人繼天麟趾來臻麟何以來  
時將太平黃河千年而一清四序遵軌轉玉衡  
日之方中破幽冥美人來駢樂我民生琴瑟不  
調絃當改更遠如期把君熊軾飲君兕觥美人  
哉治載成行哉乎願我 皇帝壽萬年匪荒寧

復嘆三首

我生四十無聞時已暮三年角巾守煙霧空村  
落日門不開獨抱鶉衾哭窮路麒麟趾折龍馬  
杳世俗那得知其故嗚呼興衰用舍總在天中



夜擊劍心茫然

其二

憶昔金閨困天牯乞身還山思維谷頻年藜藿  
口不充况復呻吟臥牀褥生子那如孫仲謀豚  
犬區區但口腹於乎天時人事兩不值我生安  
命而已矣

其三

歸來來歸愁復愁潔已不及滄溟流苦逐獼猴  
逐山雪眼中蕭蕭誰故物天涯良友半槁死我  
身雖在空皮骨於乎青山伐木鳥嚶嚶胡爲使  
我無友生

傳木虛報與諸君問余疾苦不至口述嘲  
之

善夫臥病將月餘死復不死甦未甦晨昏咆躁  
向天呼藥物丘積恨未除昨日傳生來報予言  
拉諸子過吾廬聞之頓覺眉頭舒喚取庖人飭  
賓厨奚兒舉網更捉魚脩核已具音全虛病夫  
延頸直到脯柴門不見君子車裘羊徑草今何



如嗚呼自古友道勝妻孥生死不二方丈夫疾  
病望爾來相扶疾病望爾來相扶

岳江樓觀漲送馬子莘北征

霖雨五日風不迴百川流沫連山來洪濤拍天  
浩蕩而崔嵬驅沙走石龍門開白日不到地滄  
江一何哀三山反在八水下一葦阻絕天之涯  
與君起登江上臺節物感我曠士懷六龍行天  
太陰死妖蛟孽虺胡爲哉蝸皇功虧禹德衰吾  
恐地軸今將頽短歌微吟爲君起丈夫壯年要  
爲者何事請君起長楫共擊三千水

苦節行

過漁溪聞前王王文奎之女詹氏少婦  
死節爲之泣下作苦節行

下南四郡三郡兵閩盜此日真縱橫安溪莆口  
備慘毒殺氣上冒天爲腥六師不發無戰情賊  
過一程移一程兵驕將怯往必敗疆場之事誰  
曾經官軍畏賊遠護送民兵不教將何用坐遣  
羣羊啖虎口萬姓何辜死無訟前王少女不就



虜抽身抱石沉江水詹家少婦賊殺姑罵賊不  
屈同姑死我歌苦節行淚下哽咽悲不止吾輩  
堂堂七尺軀况作男兒把天紀清風嶺曹娥渚  
長使志士哀千古吁嗟乎詹家少婦前王女

傷哉行

宿涵江聞賊盡得王莊諸婦女惟王元  
德之妻守節二十八年抗死房闔中作

傷哉行

傷哉乎尚陽之南廣業之里千數茅茨變賊壘

殺人成丘山旬月不見官軍至我思八閩十七  
衛太祖以來食盡多少官倉米一朝緩急不  
得分寸力惡用飼爾民膏髓臙風吹塵汚詩禮  
安能一沃滄溟水傷哉乎垵頭山新渡嶺婦女  
不行刃加頸新渡嶺垵頭山黃金滿意婦女還  
可憐蛾眉七十二竟無一下清風灘死生在前  
良獨難傷哉乎前王寡妻獨處房帷間令人苦  
憶太古時上有堯舜下皐夔契敷五教張四維  
稷播百穀民忘饑九州分理十二牧天子端拱



而無爲四凶旣誅戮六合歌雍熙耕且讓畔行  
讓路重門暴客從何來嗟彼盜賊豈無民彘犂  
鋤化兵誰使之傷哉乎聖王不作吾已而

東歸行送殷先輩

闌風吹江江捲素雲脚如霾暗前路陶河捉抹  
應有求絡緯追秋不知處江南江北氣蕭騷十  
家九家聞叫號嚴城白日森長戟粵客中區折  
大刀道傍寡婦向人訴自從亂後多愁苦夫主  
從戎去不還大兒又在軍前死小兒九歲嬌且  
痴母子投生中道離向來喪亂饑寒在到處蝨  
螟耕織稀吳門一杯天爲悲送客那堪此道歸  
塵煙海內還消息兵革滄洲有是非東土酸風  
射客眸蘋蘩爲我薦髑髏戰場斷魂今收未古  
道腥魂招得不請君勿田太山側山樊豺虎多  
如織請君勿釣東海濱天吳九首飛殺人請君  
莫叩函谷關只今長夜正漫漫爲君生計謀不  
得一夕籌心鬢毛白

題官竹



黃河之水非淇澳亦有鐘籠挺平陸彭城官舍  
清如簇礫柯紛披成綠玉使君公餘開鼎餽清  
聲入坐可無肉酒酣戲我題官竹座中才子謝  
水曹對客跳躍先揮毫詩成奪我宮錦袍行輩  
大叫稱詩豪我憐此竹絕短小忽有感遇難成  
騷點與語曰汝之生也不似篲箒排青蒼安能  
截作笙簫來鳳凰又不似由衙大如斗惡用於  
汝爲柱梁惟應托根官舍傍且有標節儲雪霜  
中虛不肯容螻蟻作德君子多比方噫華滋爛  
死兮汝得孤存劫火滿山兮汝獨不焚子猷云  
何可一日無此君吾欲移汝歸且翁

玉華山歌贈盛太史端明

玉華兩峰天下雄力障碧海東巖從峰頭偃蹇  
千尺松停霜冒雪蒼苔封松根飛瀑聲淙淙流  
入韓江泰虬龍徵君結屋浩渺中開窗下瞰馮  
夷宮角巾一幅雙鬢鬢玉華相對爲主翁酒酣  
擊筑詠古蹟韓山越埒啼猿狖小桃溪春深淺  
紅有時鶴馭來偃儂月明小艇西復東富貴於



我如飄風鴻鵠高飛不可籠羅網繒繳難爲功  
去年闕下見一鵠今年天際冥孤鴻嗟予羈的  
未解脫驚蹄捷徑愁恍恍亦有靈源似玉華茅  
茨傾倒登羆熊安得脫身若鴻鵠萬仞峰頂時  
相從

秋夜過虎丘與方思道坐白蓮池石各賦  
一首

夜入虎丘山露坐白蓮池秋月淡淡開漣漪秋  
風嫋嫋吹葛衣月中歌聲遏雲起雙翮忽欲乘  
風飛憨憨泉甘如飴一飲數斗療我饑可中亭  
上鳴參差希音嘹亮明者誰方思道鄭繼之二  
人瞰世同一機今時莫道無鍾期吁嗟乎太行  
之路多嶮巇煙塵障天咫尺迷壯志於我夫何  
爲五斗米焉足糜南山有蕨藜北山有紫芝歸  
乎歸劔池蛟龍久不起生公法石至今疑來日  
大難知不知願言將子顛冥於武夷

遺太白山人方鳥歌

道人昔年屠赤蚪蚪革中作雲錦裘授之素女



製方鳥精比南海之輕納鷓冠鶴髦言好逯未  
有售者微其儔余知尤物終非世所畜化作雙  
鳧飛去從王喬低五嶽小六州遊汗漫三千秋  
更欲乘風觀十洲掉頭太白山悠悠饑食聚窟  
霞渴飲清海漚赤霄九萬去一息戾止豈負樊  
籠憂漢網恢恢羽獵愁雙鳧雙鳧何處求我亦  
從今理風翼覓汝干崑崙頂上之椒丘

登七十二峰閣歌

吾聞太湖東注三千水乾坤納納幾萬里東  
洞庭天際起七十二峰如聚蟻青天白日飛  
雨兵塵慘慘滿人間故國何處愁路難五湖多  
風不可渡入山魑魅相依附若爲化作鴻冥冥  
南向峰頭結煙霧終焉身重飛不得展轉湖邊  
倚高閣湖昏閣靜百感集悵望毛公謝烏鵲嵩  
高西去尋靈藥

題望夫石

自君之出西玉門寒砧夜夜驅離魂樓蘭未滅  
君不歸淚眼一注窮崑崙自紡自績孰與存眼



青直到天地昏城中少年生情性一曲離鸞豈  
堪聽妾身自是藍田璧寧向峰頭化爲石海水  
屢見成丘山猶望夫君生入關呱呱小兒尚在  
手白衣蒼狗無不有誰家去夫贖出醜世上婦  
人多姓柳

黃茅岡和東坡二首

雲龍山下黃茅岡秋風破帽聊相羊徐州大守  
遺石牀煙花十萬皆微茫白龍帝鄉千里長有  
客好事遙相望高歌不乏太守狂

其二

我醉倚歌千仞岡一聲叱起萬石羊寒笳數聲  
咽胡牀四山烽火何茫茫道路阻絕煙塵長京  
華咫尺不可望小子年來學狎狂

東征

大風從西來行子向東去黃塵十丈強沒盡傷  
心樹匹馬追風不受鞭長安回首思悠然城頭  
笳鼓晚來急村村寡婦當簷泣

鷓鴣行



行人行人子細聽鷓鴣近前語分明山有長蛇  
兼罔兩水若可涉霜濤驚哥哥欲行須蹔停君  
不見赤雉四顧不出山虞人關弓射雉還君不  
見大鵬搏風九萬里六月一息圖南徙

早發臨安

東閣冬月西關西仲冬雨雪水復微去年今年  
風色惡大有小有人煙稀於潛諸縣討大賊軍  
旅之后多蝨蝥意外征求莫大繁今日蒼生合  
蘓息

大游篇贈高宗呂

登山須騎五色羊涉水須泛無倪航一身之小  
四海遠紅光瞥影明煌煌年少離居歷寒暑孤  
鳳冥鴻自高舉東封碣石入羅浮十洲山水猶  
能數世人未斷區中緣頑腹無腸萬愁貯炎趨  
聲利赴火蛾戀食癡鷓鴣腐鼠吁嗟乎吾求此  
輩無其曹翛然六合解天弢上乘灑氣懷宇高  
丹山碧水相週遭仰天大笑秋蕭騷九州熱客  
從滔滔高生高生縱遊遨



石梁行

陰厓飭飭氣溟濛山木慘切悲回風石梁駕天  
蟠彩虹飛流下擣龍光宮上仙之都弱水東彼  
岸可度天之功十年尋仙志未已台嶽欣逢羨  
門子願君啓我元命秘荷鑿拾茅吾不耻桃源  
洞天春色多爾時劉阮今如何

慈竹引二首

北堂慈竹連理枝青陽含惠流綠滋堂中佳人  
雲珮垂霞冠鶴帔光陸離麻姑盈盈進紫觴

方小兒翺且翔徐歌緩節宵未央明星煌煌應

壽昌

其二

芙蓉朱蕤蘭紫芽含風被露齊發花庭中象席  
連鳳珈流輝照耀麒麟車麻姑盈盈進紫觴東  
方小兒翺且翔徐歌緩節宵未央明星煌煌應

壽昌

望夫石

自君之出矣日日望君歸秋風吹紫塞夜夜擣



寒衣樓蘭未滅君不歸含啼獨自下重幃玉關  
西去路如棘安得身隨鴻鴈飛食荼中自苦食  
藥那忍食西風吹妾身化作望夫石東海之水  
成丘山公平何時生入關年年風雨裏但見血  
痕斑妾心匪石不可轉君身如璧當來還

憂朔方

疾風吹塵翳天地聞道山東盡兵燹血馬健兒  
挾長弮東搏西擊過梟鷲道傍達官聞走避孛  
屬就縛如棄屣日午城門不敢開千村萬落

烽燧國家承平重文事天下州縣無武備向者  
潢池一鼓輦將軍士卒皆兒戲青衿儒生無壯  
志大募壺漿與簞食焚香拜首願勿殺金帛婦  
女豈論費落日縣官走饋遺十且八九被拘繫  
北方郡縣一掃空田野但見旌旗熾青城圍解  
清河棄萬室遊魂化魑魅黃昏腥血赭河水白  
日慘愴照殘趾萬騎長驅入廣平廣平赤子無  
噍類邇者又聞消息惡北出居庸誘胡騎黃頭  
奚兒好射利陰山驕子更多知黃河水合不可



知秉鈞老子毋輕易塞內羌戎不可恃目下亦  
作中原祟 天子宵衣重撫諭野心狼子終攜  
貳少谷山人夜不寐十年家食嘗驚悸一編狂  
言不敢忌欲叩 帝闈淚如漬

太白山人歌

吾聞太白之山橫絕沙磧東去天盈尺秦地雄  
陰厓古雪吹烈風開闢以來如白龍赤日橫半  
度百草不發天無功山中之人冰雪容食霞吸  
露五內空綠雲結交河上公壽三千歲顏如童  
北招汗漫南挾韓終椒丘縣圃直天幾度拊嘴  
捫畢天爲通長髯下照滄海水玄虬跋浪吹蒼  
穹視彼守株之徒奚啻黃鵠之與壤蟲吾將乘  
元氣與君遊無窮

粵中元父歌

泉山老子金馬仙青陽溫風春可憐魚須奉  
帝三十年角巾南首泉山前司徒起家青棘郎  
娟娟寒素臨秋霜炯如白鳳從 君王瑞文冥  
舉天地荒壺公山人見素子頻年三出還三已



玄文突兀凌太華峻節孤稜冠青史木蘭江上  
弄煙水豸角雞香惡用爾中丞謇謇新齋公黷  
如月露映梧桐白筆持裁陳素封殿前斥奸氣  
如虹蒼蠅貝錦心不同中丞解纓猶潰癰蚤歲  
稱知犯公眼酬知力共塘蒲晚齊州腥氛黯長  
夜飛騰願附冥鴻遠玉龍手提不可成長歌一  
夕雲河傾

苦寒行二首

刀兵之餘氣不淑立春一月寒猶酷東日微燄  
背暘谷西風獵獵遺華屋吳儂號饑拜人前吳  
姬受凍啼門曲去年冬雷折地軸

其二

南冠丈人何偏久惡風吹雲閉春色白梅陰多  
開苦遲黃鸝口噤啼不得東方征輪斷無迹嗚  
呼彼蒼未肯迴天戎翻令絲絮專元功

河上行

白鴈噉噉思朔方烏衣逐逐度河隍河間草樹  
色焜黃淮西二月春悲涼北風慘慄日無光洪



濤歛天不可航晨風下食百鳥藏妖虬怒鯨連  
山長途遙日暮雨沾裳臨河欲渡愁無梁散髮  
狂夫何郡郎笙篴絃絕聲不揚側身天地夜未  
央愁燕愁粵熱中腸

鄭少谷先生全集卷二



